

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH SOALAN : 18 MAC 2019 (ISNIN)

SOALAN NO. 26

Minta **MENTERI PEMBANGUNAN USAHAWAN** menyatakan usaha yang dilakukan oleh Kementerian di dalam meningkatkan kepelbagaian produk halal keluaran usahawan Bumiputera bagi memenuhi permintaan terhadap produk tersebut yang semakin meningkat di dalam dan di luar negara.

JAWAPAN

Tuan Yang Dipertua,

1. Adalah menjadi tumpuan Kementerian Pembangunan Usahawan (MED) untuk meningkatkan kepelbagaian produk halal usahawan Bumiputera, melihat kepada potensi industri halal di mana jumlah keseluruhan eksport barangan halal telah mencatatkan peningkatan dari RM26.2 bilion pada tahun 2010 kepada RM43.3 bilion pada tahun 2017. Bagi membantu usahawan Bumiputera, beberapa program telah dipergiatkan oleh MED, antaranya:

(a) Program Peningkatan Enterpris Bumiputera (BEEP)

Bertujuan meningkatkan daya saing PKS Bumiputera menerusi bantuan bersepadu yang meliputi persijilan halal, khidmat nasihat, latihan dan sokongan kewangan. Program ini dilaksanakan dengan kerjasama Kerajaan Negeri dan bantuan kewangan yang diberikan

adalah dalam bentuk geran bersamaan. Untuk tempoh 2014 sehingga 31 Januari 2019, sejumlah 1,995 kelulusan telah diberikan melibatkan geran berjumlah RM189 juta.

(b) Program Pementoran PKS

SME Corp dan Perbadanan Pembangunan Industri Halal (HDC) dengan kerjasama syarikat multinasional telah melaksanakan Program Pementoran PKS bertujuan untuk membangun, meningkat keupayaan dan menambah baik prestasi perniagaan PKS tempatan dalam industri makanan dan minuman Halal di Malaysia, bagi membolehkan mereka bersaing di pasaran global. Sehingga kini sebanyak 570 PKS telah menyertai dan mendapat manfaat daripada program ini.

(c) Program *Showcase* Satu Daerah Satu Industri (SDSI)

Di bawah MED, program SDSI kini lebih bersasar ke arah memasarkan produk halal PKS dan mikro PKS serta koperasi di peringkat daerah dan negeri ke pasaran yang lebih luas melalui sesi pepadanan perniagaan yang telah diadakan dengan syarikat peruncitan tempatan dan pasar raya besar. Dua siri SDSI telah dilaksanakan setakat ini iaitu SDSI Perak pada 19-20 Januari 2019 (jualan sebanyak RM4.4. juta) dan SDSI Terengganu (RM6.9 juta) pada 15-16 Februari 2019. Siri SDSI ini akan diteruskan ke negeri-negeri lain bagi membantu mempromosi produk-produk IKS di setiap negeri.

Tuan Yang diPertua,

2. Untuk membantu usahawan tempatan mengeksport produk dan perkhidmatan Halal ke luar negara, MED juga terus melaksanakan program seperti:

(a) Program Going Export (GoEx)

Melalui program ini, usahawan akan diberikan bimbingan kawalan mutu, rekabentuk dan penjenamaan yang memenuhi standard antarabangsa. Sejak 2014, 287 PKS telah menyertai program ini

NO. SOALAN: 26

dengan 40 pasaran baharu telah diteroka dan nilai potensi jualan eksport sebanyak RM503.8 juta.

(b) Program Galakan Eksport Bumiputera (GEB)

Bantuan geran bersamaan dan skim pinjaman mudah disediakan bagi membantu meningkatkan keupayaan eksport syarikat PKS Bumiputera serta menambah bilangan PKS Bumiputera yang mampu untuk menembusi pasaran global. Untuk tempoh 2016 sehingga Januari 2019, sejumlah 46 permohonan telah diluluskan dengan nilai geran dan pinjaman berjumlah RM44 juta.

(c) Ekspo Halal Malaysia 2019

Ekspo HALAL Malaysia 2019 telah diadakan buat julung kalinya pada 24 - 26 Januari 2019 khusus untuk meneroka pasaran Jepun sempena Sukan Olimpik Jepun 2020. Sepanjang tiga (3) hari acara ini berlangsung, sebanyak 223 Sesi Pemandaran Perniagaan telah direkodkan dengan 144 PKS telah mengambil bahagian yang menjana potensi jualan sebanyak RM135 juta.

3. Fokus MED juga ke arah pembangunan sumber bahan utama dalam penghasilan produk-produk halal bagi meningkatkan kepelbagaian produk halal usahawan Bumiputera. Antara langkah yang sedang diusahakan MED ialah untuk menghasilkan industri pembuatan gelatin halal di Malaysia dengan penglibatan sektor swasta. Perbincangan awal telah diadakan dengan Jabatan Kemajuan Islam Malaysia (JAKIM) dan beberapa negara pengeksport lembu terbesar bagi merealisasikan hasrat ini dengan kadar segera.

Sekian, terima kasih.